

# LA QUOTIDIANA

FMR Fundaziun Medias Rumantschas, Via da Masans 2, 7000 Cuirà, 081 544 89 11, redacziun@fmr.ch



## Gastronomas el museum da Laax

L'jamna avon las vacanzas d'atun porscha la tiarza superiura dalla Scolaviva da Laax dapi entgins onns in project special: els cuschinan tratgas da pli baul. Uonn ei il motto staus dedicaus als gusts dil poet Flurin Camathias e tgei che quel havevi bugen ord cuschina. La gruppa da gastronomas e gastronoms giuvenis ha delectau in triep glied marvegliusa. Tgei buontads ch'ils giuvenils han preparau ei restau in misteri tochen la davosa minuta. (fmr/abc)



Davon il museum era la cuschina mobila pil past opulent.

FOTOS AUGUSTIN BEELI



Il past principal culs gnocs, ligiongja-casa e rieblas.

# Ligiongja da casa e gnocs da caputschins

Dacuort han scolaras e scolars dalla tiarza superiura dalla Scolaviva Laax envidau ad ina tscheina el museum. Cun lur scolasta Patricia Cadruvi e la menadra dil museum Romana Brunold han els organisau, cuschinau e surviu.

AUGUSTIN BEELI/FMR

Rodund 60 persunas eran s'annunziadas – e buc ina ei s'enriclada. Quell'impressiun han ins giu dacuort el museum local da Laax. Enstagl d'ir en ina pizzeria, ni da tschenar en in'ustria dils cuschiniers etabli, ein ellas stadas el museum da Laax. Per la quarta gada ha la tiarza superiura dalla Scolaviva envidau da guder tratgas da pli baul. Alla scolasta Patricia Cadruvi ed alla menadra dil museum Romana Brunold gartegia ei mintg'onn da niev da motivar ils giuvenils per quei project cumineivel. Tgei ch'ei detti, ei stau in misteri tochen la davosa minuta. L'atmosfera nostalgica ha entschiet

all'entrada. «Tgisà tgei ch'ei vegn oz sil taglier?» ei in ni l'auter sedumandaus. Inagada aveva ei dau la treppa. Tgei che quei past tradiziunal da perdanonza seigi savevan buca tuts. Uonn ha ei buca dau il manizem da cor, tschurvi, dir e lom.

## Scumpentar l'emprema fom

Ils giuvenils han dau envesta ella cuschina da sur Flurin Camathias. Il poet ha giu ils biars onns da sia pastoraziun a Breil, Andist e Siat casarinas ord il ravugl da sia parantella. Quellas enconuschevan pilpli sias preferentschas. En tut han ils giuvenils surviu tschun tagliors cun tratgas che «tegnan en». Per biars corrispondevan tals menus alla lavur greva corporala. Ina suppa

caulda deva cauld e scumpentava l'emprema fom. Ils giuvenils han encuret sezs las ingrediencias cun urtgiclas e plantagen. En schanuglias seigien els stai per rimnar il cuntegn dalla gustusa suppa.

Schnecc en bara ei stau il secund plat. Udend quei num havess ins buca spitgau ina pulenta gratinada cun caschiel e garflaunas da carn piertg. Ella sala, en combra ed en stiva dil museum han ils hospes gudiu la cumpignia cun discutir da pli baul e cun seser – sco ei s'aida – sin stabbellas, hochers e bauns. Il past principal ei stau enzatgei dil piertg. Igl ei gl'animal che ha nutriu biaras generaziuns ellas muntognas. La ligiongja-casa han las duas scolaras Noelia ed Ursina fatg sezzas ella mazlaria, cun carn d'in

piertg che ha passentau la stad si d'alp. Enstagl da survir la ligiongja culs truffels schetgs, han ins astgau guder fava da pres. Il num ha connex culla clamada da sur Flurin, autruisa denton strusch. Las «crochetts» ch'ils giuvenils han surviu, fatgas da buglia da truffels, ein gest aschi bunas sco quellas d'ina uustria da steilas. Vitier ha ei dau rieblas barsadas en pischada – excellenta cumbinaziun.

## Gnocs da caputschins sco dessert

Il dessert duei esser in finale adequat da quei ch'ins ha gudiu. La gruppa da scolars ha cumpletau il menu culs gnocs da caputschins. Aunc in plaid tier la bu-

bronda dalla tscheina: In gi seigien els stai sillas alps Nagens e Plaun, ha la moderatura Rilana raquintau. Leu hagian els encuret giva e ruaneida per far il bien te. Sils aults han scolaras e scolars era rimnau izuns, suitga cotschna e nera, sco era vinatscha e garnedels. Cun quella pumadira han els fatg il compot ch'ei ha dau tier ils gnocs. Ils paucs a meisa savevan tgei ch'ils scolars surveschian. Ils gnocs da caputschins vegnan preparai cun paun dir e semeglian ils pups-mungia ch'ei dat da tscheiver. Cun in veritabel caffè da pli baul, cun bia latg, ei la tscheina opulenta el museum buca stada pesonta. Igl ei stau ina occurrenza delectonta, inspiron-ta ed instructiva.